

**Uunga siunnersuut: Utoqqaat illersuisuat pillugu Inatsisartut inatsisaat nr. xx, xx. xxx
2019-imeersoq**

Kapitali 1

Siunertaq

§ 1. Inatsisartut inatsisaanni matumani inuiaqatigiinni utoqqarnut atugassarititaasut soqutigisaasalu iluaquserneqarnissaat siunertaavoq.

Kapitali 2

Utoqqaat illersuisoqarfiat

§ 2. Utoqqaat illersuisoqarfiat tassaavoq Utoqqaat illersuisuat allattoqarfialu. Suliffeqarfik Utoqqaat illersuisuannit aqunneqassaaq.

Imm. 2. Utoqqaat illersuisuat sulinermini politikkimut attuumassuteqarani sulivoq.

Utoqqaat illersuisuat

§ 3. Utoqqaat illersuisuat Naalakkersuisunit toqgarneqassaaq.

Imm. 2. Utoqqaat illersuisuat piffissami ukiunut 3-nut killissaleriikkamik toqgarneqassaaq. Toqqaaqqittooqarsinnaavoq.

Imm. 3. Utoqqaat illersuisuat piffissami ukiut 3-t iluanni Naalakkersuisunit tunuartinneqarsinnaavoq, tamatumunnga pissutaasinnaasut ataaseq arlallilluunniit kinguliini taaneqartut naammassineqarsimappata:

1) Inatsisartut inatsisaat manna malillugu Utoqqaat illersuisuata suliassaasa suliarineqarnerat Utoqqaat illersuisuannit annertuumik sumiginnarneqarsimappata.

2) Utoqqaat illersuisuat iliuuseqarsimappat Utoqqaat illersuisuata Inatsisartut inatsisaannut tunngatillugu suliassaasa Utoqqaat illersuisuannit isumannaatsumik suliarineqarnissaannik nalorninarsitsilersumik.

Imm. 4. Utoqqaat illersuisuata manna tikillugu illersuisuusimasup tunuartinneqarneranut atatillugu Utoqqaat illersuisussaannik nutaamik toqqaasoqartillugu, tak. imm. 3, ukiut 3-t iluanni piffissami sinneruttumi Utoqqaat illersuisussaat nutaaq toqgarneqassaaq.

Utoqqaat illersuisuata suliassai

§ 4. Utoqqaat illersuisuata utoqqaat periarfissaasa soqutigisaasalu qulakkeernissaat iluaqusernissaallu suliariissavai kiisalu utoqqaat atugaannik qitiutitsillunilu paasissutissiisassaaq.

Imm. 2. Pingaartumik Utoqqaat illersuisuat:

- 1) Utoqqaat atugaat periarfissaallu pillugit utoqqarnut siunnersuillunilu ilitsersuisassaaq.
- 2) Utoqqaat atugaat pillugit apeqqutinut tunngassuteqartunik, pisortani oqartussanut, pisortat namminersortullu suliffiinut kiisalu kattuffinnut peqatigiiffinnullu il.il. siunnersuillunilu ilitsersuisassaaq.
- 3) Inuaqatigiinni utoqqaat, atugaallu pillugit inuaqatigiinni ilisimasat annertusarnissaat sulissutigissavaa.
- 4) Utoqqaat pillugit paasissutissanik ingerlatitseqqittassalluni, tamat oqallinneranni sinnerlugin oqaaseqartassalluni kiisalu utoqqaat oqallinnermi peqataanissaannut periarfissaasa pitsaanerulernissaannik sulissuteqartassalluni inuaqatigiinnilu ineriartornermik sunniuteqartassalluni.
- 5) Utoqqaat atugaannik periarfissaannillu patajaallisaataasunik suliniutissanik siunnersuuteqartassaaq.

Imm. 3. Kommuninit kattuffinnillu utoqqarnik sullisisut utoqqarnut sinniisui, Utoqqaat illersuisuata sulineranut naleqquttumik periarfissaqarnerlu allaavigalugit imm. 2, nr. 1-5 malillugit peqataatinneqartassapput.

§ 5. Utoqqaat atugaannut pingaaruteqartunik inatsisitigut suliniutinut allatigullu suliniutinut atatillugu Utoqqaat illersuisuata tusarniarneqartassaaq.

§ 6. Utoqqaat atugaannut pingaaruteqartuni apeqqutini nalinginnaasuni Inatsisartut, Naalakkersuisut aamma pisortani oqartussat allat Utoqqaat illersuisuannik isumasiuisinnaapput.

§ 7. Utoqqaat illersuisuata ukiut tamaasa suliffeqarfiniti pillugu ukiumoortumik allaganngorlugu nalunaarusiortassaaq.

Imm. 2. Nalunaarusiaq Utoqqaat illersuisuata nittartagaani tamanut saqqummiunneqartassaaq.

Imm. 3. Nalunaarusiaq, saqqummiussineq ilutigalugu, Naalakkersuisunut, Inatsisartunut kommuninullu nassiunneqartassaaq.

Utoqqaat illersuisuata piginnaatitaaneri

§ 8. Utoqqaat illersuisuata piginnaatitaavoq Utoqqaat illersuisuata suliaqarfinitut pissutsit attuumassuteqartut pillugit killilersorneqarnani oqaaseqarsinnaanermut, taamaattorli tak. § 11. Oqaaseqaatit kimut sammitinneqassanersut Utoqqaat illersuisuata nammineq aalajangertassavaa.

Imm. 2. Utoqqaat illersuisuata pissutsit utoqqarnut ataasiakkaanut tunngassuteqartut pinnagit, pissutsit utoqqarnut nalinginnaasumik tunngassuteqartut kisiisa oqaaseqarfingisinnavaai.

Imm. 3. Utoqqaat illersuisuata taamaallaat oqaaseqaateqarsinnaatitaavoq. Utoqqaat illersuisuata aalajangiisinnaatitaanngilaq.

Allattoqarfik

§ 9. Isumaginninnermut aqutsisoqarfik Utoqqaat illersuisuannut allattoqarfimmik isumaginnituuvooq. Allattoqarfik aqutsinermi allaffissornikkut suliaqassaaq aamma suliamut tunngasunik Utoqqaat illersuisuannut ikuuttassalluni.

Kapitali 3
Suliamik suliariinninnermi malittarisassat

§ 10. Utoqqaat illersuisuata sulinerani pisortat ingerlatsiviini sulianik suliariinnitarneq pillugu Inatsisartut inatsisaata toqqaannartumik atorneqarsinnaanngiffiani, Inatsisartut inatsisaanni, aamma ingerlatsivinni ingerlatsinerup inatsisitigut periutsini tunngavigisat, aamma inatsisitigut aalajangersarneqarsimannngitsunut, taamatut atuutsinneqassapput.

Imm. 2. Utoqqaat illersuisuata saaffiginninnerit itigartissinnaavai aamma suliat, Utoqqaat illersuisuannit ingerlanneqartut unitsillugit inissikkallarsinnaavai.

Imm. 3. Utoqqaat illersuisuata saaffiginnissutinik itigartitsineri aamma sulianik unitsitsilluni inissiigallarneri, Utoqqaat illersuisuata nammineq piumassutsini naapertorlugu suliariersimanngisaminik, allaganngortinneqassapput tunngavilersorneqarlutillu.

Imm. 4. Utoqqaat illersuisuata saaffiginnissutinik itigartitsineri aamma sulianik unitsitsilluni inissiigallarneri Naalakkersuisunut imaluunniit allaffissornikkut oqartussanut allanut naammagittaalliuutigineqarsinnaanngillat. Assinganik Utoqqaat illersuisuata oqaaseqaataanut tamanna atuuppoq.

§ 11. Utoqqaat illersuisuat allattoqarfillu § 9 naapertorlugu pisortani ingerlatsivinni sulinermi malittarisassat atuuttut najoqqutaralugit nipangiussisussaatitaapput.

Kapitali 4
Aningaasalersuineq

§ 12. Utoqqaat illersuisoqarfiat aningaasalersorneqassaaq nunatta karsianit tapiissutit aqutigalugit.

Imm. 2. Utoqqaat illersuisuat sulinerminut atatillugu pisortani oqartussanit allanit imaluunniit kattuffinnit, peqatigiiffinnit, suliffeqarfinnit namminersortunit il.il.

ningaasaliiffigineqarnissamik qinnuteqarsinnaavoq.

Imm. 3. Utoqqaat illersuisuat inatsisit aalajangersakkat iluanni suliniarsinnaavoq aningaasatigut isertitaqarnermik nassatalimmik. Isertitat Utoqqaat illersuisuata inatsisinik tunngaveqartunik suliassaanik naammassinninnissaanut ilaassapput.

Missingersuutit naatsorsuutillu

§ 13. Utoqqaat illersuisuat ukiut tamaasa Naalakkersuisunut ukiumut aningaasarsiorfiusumut tulliuttumut aningaasatigut missingersuutissatut siunnersummik tunniussaqartassaaq.

Siunnersuut isertitassatut aningaasartuutissatullu missingersuutinik imaqassaaq. Utoqqaat illersuisuata ilutigalugu ukiumut aningaasarsiorfiusumut pineqartumut nunatta karsiata tapiissutaasa annertussusissaannut siunnersuut tunniuttassavaa.

Imm. 2. Aningaasatigut missingersuummut siunnersuutip aamma ukiumut naatsorsuiffimmut tulliuttumut nunatta karsiata tapiissuteqarnissaata annertussusissaanut siunnersuutip tunniunneqarfissaanut Naalakkersuisut piffissaliissapput.

§ 14. Utoqqaat illersisoqarfiata ukiumut naatsorsuiffiata ukioq naatsorsuiffik malissavaa.

Imm. 2. Ukiumut naatsorsuutit inernerri kukkunersiorneqassapput kukkunersiuismik nunap karsianik kukkunersiusartumit.

§ 15. Utoqqaat illersuisuata ukiumut naatsorsuutit kukkunersiorneqarsimasut, kukkunersiusup oqaaseqaataanik ilangussartallit, Naalakkersuisunut akuerisassanngortillugit saqqummiutissavai.

Imm. 2. Naalakkersuisut saqqummiussinissamut piffissaliissapput, tak. imm. 1.

Kapitali 5 *Atuutilerfia*

§ 16. Inatsisartut inatsisaat manna, ulloq 1. januaari 2020-mi atuutilissaq.

Namminersorlutik Oqartussat, ulloq xx xxx 2019.

Kim Kielsen